

欽定古今圖書集成

曆象彙編歲功典





欽定古今圖書集成曆象彙編歲功典

第三十一卷目錄

仲春部雜錄

仲春部外編

社日部彙考

詩經

小雅甫田章

禮記

月令

周禮

春官

風俗通義

社神



宋書

禮志

荆楚歲時記

社綜

提要錄

社翁雨

癸辛雜識

社日分菊

田家五行

五戊為社

遵生八牋

社日事宜

社日事忌

事物原始

社日

直隸志書

遵化州

新安縣

肅寧縣

景州

縣 清河縣

大名縣

吳橋縣

定州

武邑縣

鷄澤

山東志書

長山縣

曹州

定陶縣

山西志書

陽曲縣

蒲縣

垣曲縣

潞安府

社縣 寧武關

長子縣

壺關縣

陵川縣

榆

河南志書

胙城縣

陝西志書

咸寧縣

商州

平涼府

江南志書

太倉州

高郵州

如臯縣

通州

江縣 徽州府

婺源縣

太平縣

建德縣

太平府

浙江志書

海寧縣

嘉興府

烏程縣

孝豐

德縣 遂昌縣

會稽縣

嵊縣

寧海縣

建



江西志書 武寧縣 德安縣 寧州 安義縣 德化縣 瑞

州府 新昌縣

湖廣志書 崇陽縣 通山縣 鍾祥縣 雲夢 縣 黃州府 羅田縣 江陵縣

祁陽縣 寧遠縣 江華縣 新田縣

福建志書 建寧府 建安縣 建陽縣 將樂 縣

廣東志書 香山縣 雷州府 西寧縣

廣西志書 永寧州

社日部總論

兼明書 社日

歲功典第三十一卷

仲春部雜錄

詩經鄭風野有蔓草 疏 蔓草生而有露謂仲春時也

民思此時而會者謂此時是婚日

豳風七月末章注二月四陽作蟄蟲起陽始用事則

亦始起冰而廟薦之

小雅小明章昔我往矣日月方除 注 除除舊生新謂

二月初吉也

昔我往矣日月方奧 注 奧暖也 大孔氏曰即春溫亦



謂二月也

國語大史告稷曰自今至於初吉陽氣俱烝土膏其動弗震弗渝脉其滿膏穀乃不殖注初吉二月朔日也

易乾鑿度隨者二月卦陽德施行蕃決難解萬物隨陽而出

易緯驚蟄晷長八尺二寸當至不至則霧稚禾不成老人多病嚏未當至而至多病癰疽脛腫

春分晷長七尺四寸二分當至不至先旱後水歲惡

米不成多病耳癢

孝經說天有七衡春分之日日在中衡

黃帝宅經二月土氣衝坤方坤為人門龍腸宜置牛馬廐其位欲開拓壅厚亦名福囊重而兼實大吉乙庚日修

管子輕重己篇以冬至始數九十二日謂之春至陶朱公書驚蟄前後有雷謂之發蟄雷聲初起從乾方來主人民災坎方來主水艮方來主米賤震方來主歲稔巽坤方來主蝗蟲離方來主旱兌方來主五



古今圖書集成  
金長價

春分雨人有災諺云春分無雨病人稀

二月朔日值驚蟄主蝗蟲值春分主歲歉風雨主米貴

二月總占詩曰初二天晴東作興初七八日看年成花朝此夜晴明好何慮連絲夜雨傾

二月初八東南風謂之上山旗主水西北風謂之下山旗主旱

二月內虹見在東主秋米貴在西主蠶貴

二月十二爲百花生日無雨百花熟

二月十五爲勸農日晴和主年豐風雨則歲歉

二月十九觀音生日晴主好雨則諸物少收

二月間將貼梗海棠攀枝著地以肥土壅之自能生根來冬截斷春半移栽以棠梨接之則成西府以木

瓜接之則成白色

山茶二月接以單葉接千葉則花盛而樹久

史記天官書單闕歲歲陰在卯星居子以二月與婺女虛危晨出日降入大有光其失次有應見張名曰



降入其歲大水

辰星仲春春分夕出郊奎婁胃東五舍爲齊

漢書五行志於易雷以二月出其卦曰豫言萬物隨雷出地皆逸豫也

汜勝之書種麻子二月下旬傍雨種之麻生布葉鋤之以蠶矢糞之天旱以流水澆之無流水曝井水殺其寒氣以澆之如此美田則畝五十石及百石薄田尚三十石

種植書凡種竹於二月斲去西南根於東北角種其

鞭自然行西南蓋竹性向西南行也諺云東家種竹西家種地

淮南子天文訓辰星正四時常以二月春分效奎婁白虎通五行篇二月律謂之夾鍾何夾者孚甲也言萬物孚甲種類分也

論衡祭意篇龍星二月見則雩祈穀雨

說文媮楚俗以二月祭飲食也一曰祈穀食新曰離媮

春分而禾生



古今圖書集成  
卯爲春門萬物已出

風俗通義鼓者郭也春分之音也萬物郭皮甲而出故謂之鼓

四民月令二月陰凍畢澤可蓄美田緩土及河渚水處

農家諺二月昏參星夕杏花盛桑葉白

月令章句自壁八度至胃一度謂之降婁之次雨水春分居之魯之分野

晉書天文志老人星曰南極以春分之夕見於丁

北史庾季才傳二月日出卯入酉居天之正位謂之二八之門

抱朴子仙藥篇龍御芝常以仲春對生三節十二枝下根如坐人

華陽國志雲南郡出孔雀常以二月來翔月餘而去廣州記鷄侯菜生嶺南似艾二月生苗宜鷄羹食之范汪祠祭仲春薦竹笋

名醫別錄百合生荊州山谷二月采根陰乾

麝生中臺山谷及益州雍州山中春分取香生者良



桑螵蛸生桑枝上螳螂子也二月采蒸過火炙用

魏書律曆志次卦二月需隨晉解大壯

齊民要術二月昏參夕可種大豆謂之上時

北土高原本無陂澤隨逐隈曲而田者二月冰解地

乾燒而耕之仍即下水十日塊既散液持木斫平之

納種既生七八寸拔而栽之

家政法曰二月可種瓜瓠

種茄子法茄子熟時摘取擘破水淘之取沈者速曝

乾裏置二月畦種著四五葉雨時合泥移栽之

種芋法宜擇肥緩土近水處和柔糞之二月注雨可

種芋率二尺下一本芋生根欲深斫其旁以緩其土

旱則澆之有草鋤之不厭數多治芋如此其收常倍

蘘荷宜在樹陰下二月種之一種永生亦不須鋤微

加糞

二月榆莢成及青收乾以為旨蓄色變白將落可作

蓄醢音音牟醢隨節早晏勿失其適音頭榆醬

周易集解帝出乎震崔憬曰帝者天之王氣也至春

分則震王而萬物出生



舊唐書林邑國俗以二月爲歲首稻歲再熟

唐韻鴝鳩鳥名關西曰巧婦關東曰鴝鳩春分鳴則衆芳生秋分鳴則衆芳歇

嶺表錄異嶺表朱槿花莖葉皆如桑樹葉光而厚

南人

謂之佛桑樹身高者止於四五尺而枝葉婆娑自二月開

花至於中冬方歇其花深紅色五出如大蜀葵有藥一條長於花葉上綴金屑日光所爍疑有焰生一叢之上日開數百朵雖繁而有豔且近而無香暮落朝開插枝卽活故名之槿俚女亦採而鬻一錢售數十

朵若微此花紅梅無以資其色

嶺南異物志南中花多紅赤亦彼之方色也唯躑躅爲勝嶺北時有不如南之繁多也山谷間悉生二月發時照耀如火月餘不歇

南州異物志橄欖閩廣諸郡及沿海浦嶼間皆有之樹高丈餘葉似檉柳二月開花

異物志甘藷出交廣南方民家以二月種食譜張手美家二月十五日涅槃兜

種樹書竹本命日二月二日也



酉陽雜俎焉者二月八日婆摩遮

波斯棗出波斯國長三四丈圍五六尺葉似土藤不凋二月生花狀如蕉花有兩甲漸漸開罅中有十餘房子長二寸黃白色有核熟則紫黑狀類乾棗味甘如錫可食

安息香樹出波斯國呼爲辟邪樹長二三丈二月開花黃色花心微碧不結實

茶譜蒙山有五頂上有茶園蒙之中頂茶當以春分之先後多聚人力俟雷發聲併手採擇三日而止

日華本草菖蒲石澗所生堅小一寸九節者上出宣州二月采

晁氏客話望杏而耕以杏花時爲耕候也

益部方物略記桐花鳳二月桐花始開是鳥翱翔其間丹碧成文纖嘴長尾仰露以飲至花落輒去蜀人珍之故號爲鳳或爲人捕置樊間飲以蜜漿哺以炊粟可以閱歲

成都古今記二月有花市嘉祐本草斑鳩是處有之春分化爲黃褐候黃褐候



古今圖書集成  
青鶴也

圖經本草白榆先生葉却著莢皮白色二月剝皮刮去粗殼中極滑白荒歲農人取皮爲粉食之當糧不損人

烏薺二月生苗多在林中作蔓

圖經宕渠之地每歲二月二日郡人從太守出郊謂之迎富梧州容縣有迎富亭亦以二月二日爲節

雲笈七籤二月六日宜沐浴齋戒天祐其福

埤雅芍藥榮于仲春華于孟夏傳曰驚蟄之節後三

十有五日芍藥榮是也

夢溪筆談二月物生根魁故曰天魁

孔氏雜說河豚盛於二月梅堯臣詩春洲生荻芽春岸飛楊花河豚當是時貴不數魚蝦

爾雅翼倉庚黃鳥而黑章齊人謂之搏黍秦人謂之黃流離幽冀謂之黃鳥一名黃鸝畱或謂之黃栗流一名黃鶯二月而鳴

演繁露仲春之月天子食麥而朝事之籩粢麥爲麩齊東野語余嘗讀班史曆至周三月二日庚申驚蟄



而有疑焉蓋周建子爲歲首則三月爲寅今之正月也雖今曆法亦有因置閏而驚蟄在寅之時然多在既望之後不應在月初而言二日庚申也及考月令章句孟春以立春爲節驚蟄爲中又自危十度至壁八度謂之豕韋之次立春驚蟄居之衛之分野自壁八度至胃一度謂之降婁之次雨水春分居之魯之分野然後知漢以前皆以立春爲正月節驚蟄爲中雨水爲二月節春分爲中也至後漢始以立春雨水驚蟄春分爲序爾雅師古於驚蟄註云今日雨水於

夏爲正月周爲三月於雨水註云今日驚蟄夏爲二月周爲四月蓋可見矣史記曆書亦爲孟春冰泮啓蟄左傳桓公五年啓蟄而郊杜氏註以爲夏正建寅之月疏引夏小正曰正月啓蟄故漢初啓蟄爲正月雨水爲二月節及太初以後更改氣名以雨水爲正月中驚蟄爲二月節以至於今由是觀之自三代以至漢初皆以驚蟄爲正月中矣又漢以前穀雨爲三月節清明爲三月中亦與今不同  
暇日記二月白蘋水



山家清供仲春深采黃精根九蒸九暴擣如飴可作果食又細切食水二石五升煮去苦味漉入絹袋壓汁澄之再煎如膏以黃米作餅約二寸大客至可供二枚又采苗可爲菜茹隋羊公服法芝艸之精也一名仙人餘糧其補益可知也

試茶錄建溪茶比他郡最先北苑壑源尤早歲多暖則先驚蟄十日卽芽歲多寒則後驚蟄五日始發先芽者氣味俱不佳惟過驚蟄者最爲第一民間常以驚蟄爲候又以春陰爲采茶得時

北苑茶錄白茶與勝雪白驚蟄前興役浹日乃成飛騎疾馳不出仲春已至京師號爲頭綱玉芽

北苑別錄驚蟄萬物始萌茶每歲常以前三日開焙通考甲子日發雷大熱一云大熟

談薈二月十六日謂之黃姑浸種日西南風主大旱二月二十日謂之小分龍日晴分嬾龍主旱雨分健龍主水

經世民事錄二月內有三卯則宜豆無則早種禾二月種阜莢有不結阜莢者鑿一孔入生鐵四五斤



古今圖書集成  
用泥封之便開花結子或樹身南北離地一尺各鑽一孔用木釘釘之泥封其竅便結實

便民圖纂二月宜連霜諺曰一夜春霜三日雨三夜春霜九日晴

農桑通訣二月間取帶泥小藕栽池塘淺水中或糞或豆餅壅之則愈盛

春分前栽蓮則花出葉上

漱石閒談二月初一日爲中和節以其揆三陽之中配仁義之和唐德宗時李泌置

學圃雜疏王瓜出燕京者最佳其地人種之火室中逼出花葉二月初卽結小實中官取以上供

餅史月表二月花盟主西府海棠玉蘭緋桃花客卿繡毬花杏花使令寶相花種田紅木桃李花月季花剪春羅

花曆二月桃天玉蘭解紫荆繁杏花飾其靨梨花溶李能白

月令演二月獻生子朔踏青二日芳春節八日祭馬祖剛日

治蠶酒社日撲蝶會十五



田家五行二月八日張大帝生日前後必有風雨極  
準俗謂請客送客雨正日謂之洗街雨初十日謂之  
洗廚雨

道書二月一日爲天正節

左編陰陽家以二月六日利行師

本草綱目梨樹高二三丈尖葉光膩有細齒二月開  
白花如雪六出

芹有水芹旱芹水芹生江湖陂澤之涯旱芹生平地  
有赤白二種二月生苗其葉對節而生似芎藭莖有

節稜而中空其氣芬芳

楊梅樹葉如龍眼及紫瑞香二月開花結實

銀杏生江南以宣城者爲勝高二三丈葉薄縱理儼  
如鴨掌形有刻缺面綠背淡二月開花成簇青白色  
二更開花隨即卸落人罕見之

榛樹低小如荆叢生二月生葉如初生櫻桃葉多皺  
文而有細齒及尖

薤葉似韭二月開細花紫白色根如小蒜一本數顆  
相依而生



古今圖書集成  
山慈姑冬月生葉二月中枯一莖如箭幹高尺許莖  
端開花白色亦有紅色黃色者上有黑點其花乃衆  
花簇成一朶如絲紐成可愛

山茱萸葉如梅有刺二月開花如杏

椰子乃果中之大者其樹初栽時用鹽置根下則易  
發木似桄榔檳榔之屬通身無枝其葉在木頂長四  
五尺直聳指天狀如棕櫚勢如鳳尾二月開花成穗  
出於葉間長二三尺大如五斗器仍連著實一穗數  
枚

白桐卽泡桐也其木輕虛不生蟲蛀作器物屋柱甚  
良二月開花如牽牛花而白色結實大如巨棗長寸  
餘殼內有子片輕虛如榆莢葵實之狀

蠶豆二月開花如蛾狀紫白色又如豇豆花結角連  
綴如大豆頗似蠶形蜀人收其子以備荒歉

扁豆二月下種蔓生延纏葉大如盃團而有尖其花  
狀如小蛾有翅尾形如莢嫩時可充蔬食茶料老則  
收子煮食

珊瑚菜江淮所產多是石防風生于山石之間二月



采嫩苗作菜辛甘而香呼爲珊瑚菜

馬蘭湖澤卑濕處甚多二月生苗赤莖白根長葉有刻齒南人多采灼曬乾爲蔬及饅餡

萋蒿生陂澤中二月發白葉似嫩艾而岐細面青背白其莖或赤或白其根白脆采其根莖生熟菹曝皆可食

群芳譜淮揚人二月二日採野茵陳苗和粉麪作餅食之以爲節物

海槎餘錄海鰵乃水族之極大者梧川山界有海灣

上下五百里橫截海面當二月之交海鰵來此生育隱隱輕雲覆其上風日晴暖則有小海鰵浮水面隨波蕩漾而來

荆溪疏竹菇蕈也小如錢赤如丹砂生以二月山中所在皆有之

一統志沔縣度水有二源曰清檢濁檢清水出鱖魚濁水出鮒魚常以二月取之

萬寶全書春分日西風麥貴南風先水後旱北風米貴



選擇曆書二月申爲天德日申與巳合用巳爲天德合日

居家必用二月初二日或清明日五更不語採薺菜梗陰乾作剔燈杖諸蟲不入燈盞

閩部疏閩中大都氣暖春花皆先時放方二月下旬已見躑躅每肩輿行山徑中喬松灌木互相掩映綠波外揚丹崖內聳鷓鴣啼晝晝眉弄舌殊不知巾車爲苦

汀人多種李二月時田園碎白滿野時間桃紅繽紛

可喜

自邵武之建陽六十里間是閩西最佳麗地原隰平衍竹樹田疇豐美饒裕邨落相望煙火不絕夾溪面衡人家時有數百於時二月將盡躑躅始放梨花未殘海棠金爵盡以樊圃山花野卉多不可名真令人應接不暇



仲春部外編

法苑珠林東晉穆帝永和六年二月八日夜有像現于荊州城北長七尺五寸合光趺高一丈一尺皆莫測其所從初廣州商客下載中夜覺有人來奔船驚共尋視了無所載而船載自重雖駭其異而不測也及達渚宮纔泊水次夜復覺人自然登岸船載還輕及像現方知其兆

異苑晉丹陽縣有袁雙廟真第四子也真爲桓宣武誅便失所在靈怪太元中形見于丹陽求立廟未就



功大有虎患被害之家輒夢雙至催功甚急百姓立  
祠堂于是猛暴用息今道俗常以二月晦鼓舞祈祠  
爾日常風雨忽至

雲笈七籤紫微夫人降楊羲之家二月三十日吟一  
章曰褰裳涉滌河遂見扶桑公高會太林墟賞宴元  
華宮信道苟淳篤何不棲東峰此亦敘方諸東華之  
勝也

述異記義熙五年宋武帝北討鮮卑大勝進圍廣固  
軍中將佐乃遣使奉牲薦幣謁岱嶽廟有女巫秦氏  
奉高人同縣索氏之寡妻也能降靈宣教言無虛唱  
使使者設禱因訪克捷之期秦氏乃稱神教曰天授  
英輔神魔所擬有征無戰葢爾小醜不足制也到來  
年二月五日當尅如期而三齊定焉

佛國記摩竭提國年年常以建卯月八日行像作四  
輪車縛竹作五層有承檣摠戟高二丈餘以白氎纏  
上然後彩畫作諸天形像以金銀琉璃莊校其上懸  
繒旛蓋四邊作龕皆有坐佛菩薩立侍此日境內道  
俗皆集華香供養



法苑珠林永明七年二月十九日司徒竟陵文宣王夢于佛前詠維摩一契因發聲而寤卽起至佛堂前還如夢中法更詠古維摩一契便覺聲韻流好明日卽集沙門僧辯等次第作聲

梁安國寺在秣陵縣都鄉同下里寺有金銅像一軀以永明九年起造時失去天監六年二月八日房主藥王尼所住牀前時時有光照屋至二十三日于光處忽有泉湧見此像隨水而出遠近駭觀泉旣不竭乃累磚爲井井猶存焉

道經二月八日爲芳春節五晨大道君登玉霄琳房四盼天下

隋書經籍志釋迦在世教化四十九年乃至天龍人鬼並來聽法弟子得道以百千萬億然後于拘尸那城娑羅雙樹間以二月十五日入般涅槃涅槃亦言泥洹譯曰滅度亦言常樂我淨

陽壽潛山記開元九年二月十五夜帝寢靈符殿夢來日九天使者降至午見雲端仙仗甚盛神曰吾爲九天使者受玉帝命隨運采訪九天司命真君憩舒



州潛山吾憇江州廬山九天丈人憇蜀郡青城山可各爲立祠乃遣舒州爲建祠卜地頃見二白鹿出岡頂遂于其地立九天司命祠此真源宮之始也

紀聞唐開元二十四年春二月駕在東京以李適之爲河南尹其日大風有女冠乘風而至玉貞觀集于鐘樓人觀者如堵以聞于尹尹率略人也怒其聚衆袒而笞之至十而乘風者既不哀祈亦無傷損顏色不變於是適之大駭方禮請奏聞勅召入內殿訪其故乃蒲州紫雲觀女道士也辟穀久輕身因風遂飛

至此元宗大加敬畏錫金帛送還蒲州數年後又因大風遂飛去不返

西域記伽藍北有仙人隱居巖谷仲春之月鼓擢清流麋鹿隨飲感生女子姿貌過人惟脚似鹿仙人見之收而養焉後令求火至于仙廬足所踏地跡皆有蓮花

東西洋考天妃世居莆之湄洲嶼五代時閩都巡檢林愿第六女生于太平興國四年以景德三年二月二十九日昇化厥後常衣朱衣飛翻海上里人祠之



雲笈七籤三洞奉道科云春分為延福齋  
春分後夜半子時東北望有元青黃雲是太微天帝  
君三素雲也

二月二十日宜修真道

續夷堅志忻州九龍岡上天慶觀老君殿尊像極高  
云是神人所塑每歲二月十五日道家號貞元節是  
日有鶴來會多至數十少亦不絕一二翔舞壇殿之  
上良久乃去元好問二月十五日鶴詩九龍岡上元  
元祠人言尊像神所遺年年二月降雲鶴來無定數

有定期



社日部彙考

詩經

小雅甫田章

以社以方我田既臧農夫之慶琴瑟擊鼓以御田祖

注朱社后土也以句龍氏配方秋祭四方報成萬物

禮記

月令

擇元日命民社

注陳令民祭社也郊特牲言祭社用甲日此言擇元



古今圖書集成  
日是又擇甲日之善者名誥社用戊日

周禮

春官

肆師之職社之日涖卜來歲之稼

訂義鄭康成曰社祭土為取財焉卜者向後歲稼所

宜 鄭鏐曰社有二春祈秋報

風俗通義

社神

孝經說社者土地之主土地廣博不可徧敬故封土

以為社而祀之報功也周禮說二十五家置一社但

為田祖報求詩云乃立冢土又曰以御田祖以祈甘

雨

謹按春秋左氏傳曰共工有子曰句龍佐顓頊能平

九土為后土故封為上公祀以為社非地祇

宋書

禮志

祠大社帝太稷常以歲二月八月二社日祠之

荆楚歲時記



社綜

社日四鄰並結綜會社牲醪為屋於樹下先祭神然後饗其胙

按鄭氏云百家共一社今百家所社綜即其立之社也

提要錄

社翁雨

社公社母不食舊水故社日必有雨謂之社翁雨  
癸辛雜識

社日分菊

朱斗山云凡菊之佳品候其枯斫取帶花枝置籬下至明年收燈後以肥膏地至二月即以枯花撒之蓋花中自有細子俟其苗至社日乃一一分種  
田家五行

五戊為社

立春後五戊為社其日雖晴亦多有微雨數點謂社翁不吃乾糧果驗  
遵生八牋



社日事宜

雲笈七籤曰社日飲酒一盃能治聾疾杜詩為寄治  
聾酒一盃

田家五行曰秋社日侵晨用磁器收百草頭上露磨  
濃墨頭痛者點太陽穴勞瘵者點膏肓之類謂之天  
灸

社日事忌

呂公忌曰社日令男女輟業一日否則令人不聰  
秋社日人家襁褓兒女俱令早起恐社翁為祟與春

社同

事物原始

社日

月令云仲春之月擇元日命民社使民祀之以祈農  
也近春分前後戊日乃元吉日也秋社亦然

直隸志書各省風俗同者不載

遵化州

社日用牲醴祈年

新安縣



古今圖書集成  
二月社日祭鄉社先農之神

肅寧縣

社日如春社摘梨

景州

社日賽土王社

吳橋縣

二月初二日鄉村咸祭賽土地神其古春社之遺意歟

定州

社日作樂以祀農神

武邑縣

社日會社報秋

鷄澤縣

社日春祈秋報鄉民釀錢穀具牲醴盛張鼓樂演劇祭賽畢共飲社酒曰破盤

清河縣

秋社日備牲醴酒具楮陳樂村社行賽禱略如古報賽禮



大名縣

秋報賽神多用倡優辦雜劇唱樂府酒後耳熱歌鳴  
鳴焉

山東志書

長山縣

社日祀先農調社飯

曹州

春社日集鎮村塾凡有祠宇皆作戲賽禱

定陶縣

春社集場村疇會衆祈報

山西志書

陽曲縣

仲春社日昧爽婦女作綵線人佩之曰社線食社麪

蒲縣

社日各社祀神名曰煖社

垣曲縣

秋成村社饗賽報答神祇盛集優娼搬演雜劇絃管  
擗菹沉酣達曙如魯人獵較久而難變也



潞安府

社日多造社酒社糕城中士女亦以此日走社秋社日禾稼將登士女走社視春又盛

長子縣

立秋後第五戌日為社西成將告士女出遊謂之走社其社之前後諸日鄉農陳女樂賽神名曰結秀

壺關縣

春祈秋報選里中健兒塗以粉墨為八仙為社夥以賽神賽之日男女樂畢集

陵川縣

社日田野祀社老稚擊鼓以牲酒相歡

榆社縣

秋社日各家上墳拜掃

寧武關

秋社日小兒佩社線

河南志書

胙城縣

春祈秋報賽田祖貧富不相耀社會以齒猶有古風



焉

陝西志書

咸寧縣

社日新葬者具祭品冥鏹酒餼請親族男女至墓所以祭曰上新墳三年乃止

商州

秋社日祀先農于鄉社

平涼府

八月社飲祭新禾

江南志書

太倉州

秋分在社日前則田有收而穀賤後則無收而穀貴諺云分後社白米徧天下社後分白米如錦墩

高郵州

社日鄉有社會祭畢設宴序齒列坐雖顯貴人不得先杖者

如臯縣

社無定日春秋二社城市不甚矜尚村人咸賽土神



古今圖書集成  
以祈年穀鄴侯家傳是日以猪肉雜調和鋪飯上名曰社飯臯俗尤喜爲之不特社日也

通州

社日祀土神春祈而秋報也或以三月初三日或以九月初九日祭畢受胙

懷寧縣

二月社日鄉里合立社至日豕酒共祀社神以祈穀祭畢飲神惠極歡而散有宰肉均頒之禮秋社報神亦如之

潛山縣

二月社日十家爲社共祀土神祈穀祭畢享胙極歡而散

太湖縣

二月社日種瓜蒞菜果謂得土氣先易蕃殖且無蟲

望江縣

社日鄉有社合衆姓祀之所以祈穀也祭畢則燕列齒序坐極歡而罷



徽州府

二月社日多雨社神試新水

婺源縣

俗重社祭里團結爲會社之日擊鼓迎神祭而舞以樂之祭必殞肉

太平縣

每歲秋成畢或設火醮或報土功或還神愿各處多搬演戲文

建德縣

秋社日鄉市同會者祭神于輪社者之家以報年祭畢餽而還有古人桑柘影斜之風景焉

太平府

春社寒食將近先期習社鼓祈賽土穀神猶存幽雅籥章餘風每晚百十爲羣鏗訇鏜鞞如數部鼓吹屆期崇先農聚而羣飯村釀豚蹄遍及鄉社俗最近古焉

浙江志書

海寧縣



古今圖書集成  
二月春社民間于春分前後釀金具牲醴競爲優戲  
樂神名平安戲

嘉興府

二月二十八日爲春社

烏程縣

春社日峴山有逸老會

孝豐縣

春社日各村率一二十人爲一社會屠牲醢酒焚香  
張樂以祀土穀之神謂之春福

會稽縣

春秋鄉有社祭祭畢則燕其物以祭社之餘序齒列  
坐雖貴顯人不先杖者耆老說古人嘉言懿行子弟  
歌伐木嘉魚菁莪賓筵諸詩

嵯縣

社日用牲醴延巫禱于社廟謂之燒春福巨族演戲  
先後不以期限

寧海縣

社日村落祭祖社飲



建德縣

社日各鄉設牲醴迎社神閱苗

遂昌縣

社後卜吉輿溫元帥城市拖船逐疫扮臺閣迎戲盛飾四鄉仕客雲集喧觀

江西志書

武寧縣

春社下稼秋社下麥

寧州

秋社前多雨重陰翳日或至浹旬秋寒多旱秋霧亢暘

安義縣

秋社日戊日社衆共買酒豕遊神聚飲酣歌謂之散社鄉士大夫咸載酒聯吟自亭午至晡謂之飲社

德化縣

春社祭祀畢諭以鄉約聚飲而退

德安縣

社日農家浸種



新淦縣

社欲雨占曰秋社無雨莫耕園晚禾始穗疾風晝夜則不實

新喻縣

社日魚牲登社祓旱殄蟲

瑞州府

春社之日民間釀錢辦品物祀本社土穀之神乃濕種子

新昌縣

春社新葬者各添土于塚上

湖廣志書

崇陽縣

二月社日鄉四鄰合祭本境社神祭畢飲其饌分其昨農家是日沁早稻謂之社種

通山縣

社日雨曰社翁雨里諺曰社公社母不飲舊水

鍾祥縣

農家于社日祈穀招巫覲歌鼓迎神聯臂踏地為歌



古今圖書集成  
節祭畢飲社酒分社肉間有索餘酒者曰社酒治龔  
雲夢縣  
社日沿村楮香牲醴祈田祖祭畢各泥倒于荒煙野  
草間曰享神惠

黃州府

社者三代以來之古禮也斂錢共市牲醴品無兼味  
器用陶匏以祀本社土神祀畢少長共飲間有沉醉  
扶歸者亦與民休息之意猶存三代遺風焉

羅田縣

仲春初戊日爲社每坊合爲祭賽名曰坐社

江陵縣

社日四鄰共結綜會飯爲屋于樹下先祭神後共饗  
其胙風土記荆楚社日以猪羊調和其飯謂之社飯  
以葫蘆盛之相遺送

祁陽縣

社日民間多重社齋自朝至暮不食但啜水生果夙  
有所祈于社神也

寧遠縣



古今圖書集成  
二月春社豫治蠶事務迎溫以生之生意稍遲以桑枝採水噴之種卽萌動浸早穀種布白豆黃瓜茄菜諸種晴則和暖雨雪極寒

江華縣

春社各鄉村釀錢宰屠召各巢媯女擊大鼓樂神作社相飲而罷

新田縣

春社日各村備牲醴香楮以祭穀神俗稱牛羊會是日宜雨諺云春社無雨不種田社後戊日不宜動土

用牛

福建志書

建寧府

社日鄉坊有社祭春日燕福家祀司土以粥

建安縣

秋祭社曰鴻福家祀司土以粥

建陽縣

社日村保斂分屠猪祭賽本社之神祭畢分胙會宴盡懽而退晨起輪值者作粥散給各家計口而授謂



古今圖書集成  
之社粥是日人家常令兒女早起則壽晏起則社公  
社婆遺毒宜忌

將樂縣

社日農家先期賽社春祈秋報俱同種早秧曰社秧  
廣東志書

香山縣

二月上戊祭社鄉衆必會立石于衆路之衢題名里  
域至日糾錢祭之謂之社日

雷州府

二月上戊鄉民祭社祈穀權飲是夕擊鼓逐疫

西寧縣

社日鄉有社以祀穀神城有社以祀土神均於是日  
合祀飲福

廣西志書

永寧州

社日不拘鄉市各就其處以祭而撞人社猶嚴與祭  
之日務修潔歡悅毋敢有忿爭喧譁者以其有所觸  
褻卽遭譴不爽而彝民占書奇中故畏信獨至



社日部總論

兼明書

社日

或問曰月令云擇元日命民社注云元日近春分前  
 後戊日郊特牲云日用甲日之始也與今注月令不  
 同何也答曰名誥云越翌日戊午乃社于新邑則是  
 今注月令取名誥為義也不取郊特牲為義者以社  
 祭土土畏木甲屬木故不用甲也用戊者戊屬土也  
 名誥周書則周人不用甲也郊特牲云甲者當是異



代之禮也

欽定古今圖書集成曆象彙編歲功典

第三十二卷目錄

社日部藝文一

祝社文

後漢蔡邕

社賦序

晉嵇含

祝社文

應碩

社日部藝文二

詩詞

春可樂

晉王廙

春祈社誠夏

隋牛弘



秋報社誠夏

前人

秋社日崇懷園宴得新字

唐蘇頲

社日

韋應物

社日 二首

杜甫

社前遭田父泥飲美嚴中丞

前人

二月二十七日社兼春分端居有懷簡所思者

權德輿

賽神

韓愈

吳楚歌詞

張籍

社日關路作

白居易

嘉興社日

劉言史

郊行逢社日

殷堯藩

將發循州社日於所居館宴送

裴夷直

社日村居

張演

春社從李昉乞酒

宋李濤

春社

梅堯臣

社日獨坐

范成大

春日田園雜興

前人



社日諸人集西岡

朱熹

乙酉社日偶題

楊萬里

春社

陸游

社雨

前人

社鼓

前人

社酒

前人

社肉

前人

社飲

前人

社日僧舍風雨

劉宰

今朝當社日

戴復古

社日

方岳

社前

謝翱

社日

李公麟

社日 二首

金施宜生

社日城南

元戴表元

社日

郭鈺

社日

明甘瑾

春社詞

瞿佑



社中 四首

陳憲章

社日

石瑤

社日出遊

方太古

社日 以上詩

媛項珮

浣溪沙 武康社日

宋毛滂

滿江紅 秋社桃花

趙師俠

青玉案 社日客居

趙長卿

點絳脣 秋社前一日溪光亭雨

張元幹

柳梢青 秋社懷故山

楊无咎

木蘭花慢 社日有懷

嚴仁

玉樓春 社前一日

史達祖

眼兒媚 社日

韓淉

生查子 秋社

吳文英

青玉案

黃公紹

青玉案 社日以上詞

明張大烈

社日部選句

社日部紀事

社日部雜錄



社日部外編

花朝部彙考

提要錄 花朝

事物原始 花朝

直隸志書 宛平縣 遵化州 雞澤縣 宣府

山東志書 曹縣

山西志書 黎城縣 永寧州

河南志書 羅山縣

陝西志書 清水縣

江南志書 長洲縣 嘉定縣 松江府 如臯

浙江志書 杭州府 烏程縣 桐廬縣

江西志書 浮梁縣 萬載縣 湖口縣 瑞州府 新昌

湖廣志書 通山縣 巴陵縣 石首縣 瀏陽縣 攸縣

福建志書 漳浦縣

廣東志書 香山縣 四會縣

花朝部藝文 詩詞

御製花朝賜兵部尚書裴本 明宣宗

花朝張太學西園小集 陸之裘



花朝

湯顯祖

花朝

王衡

花朝遇雨

范景文

花朝

吳稼澹

仲雪見示花朝二詩依韻奉和

以上詩

錢謙貞

浣溪沙

花朝

明楊基

滿庭芳

花朝  
以上詞

商輅

花朝部紀事

花朝部雜錄



歲功典第三十二卷

社日部藝文一

祝社文

後漢蔡邕

元正令午時惟嘉良乾坤交泰太簇運陽乃祀社靈以祈福祥

社賦序

晉嵇含

社之在於世尚矣自天子至於庶人莫不咸用有漢十日丙午魏氏擇用丁未至於大晉則社孟月之酉日各因其行運三代固有不同雖共奉社而莫議社



之所由興也

祝社文

應碩

元首肇建吉酉辰良五政敷惠四教初揚萬類資新  
英穎擢章谷風滌穢日和時光命於嘉賓宴茲社廂  
敬享社君休祚是將嘉餼綺錯白茅薦恭有肉如坻  
有酒如江社君既眷祇肅威容

社日部藝文二

詩詞

春可樂

晉王虞

吉辰兮上戊明靈兮惟社伯仲兮畢集祈祭兮樹下  
濯卵兮菹韭齧蒜兮擗鮓縹醪兮浮蟻交觴兮並坐  
氣和兮體適心怡兮志可

春祈社誠夏

隋牛弘

厚地開靈方壇崇祀達以風露樹之松梓句萌既申  
芟柞伊始恭祈粢盛載膺休祉

秋報社誠夏

前人



古今圖書集成  
北塘申禮單出表誠豐犧入薦華樂在庭原隰既平  
泉流又清如雲已望高廩斯盈

秋社日崇懷園宴得新字

唐蘇頲

鳴爵三農稔勾龍百代神運昌叨輔弼時泰喜黎民  
樹缺池光近雲開日影新生全應有地長願樂交親

社日

韋應物

山郡多暇日社時放吏歸坐閣獨成悶行塘閱清輝  
春風動高柳芳園掩夕扉遙思里中會心緒悵微微

社日二首

杜甫

九農成德業百祀發光輝報效神如在馨香舊不違  
南翁巴曲醉北鴈塞聲微尚想東方朔詼諧割肉歸  
陳平亦分肉太史竟論功今日江南老他時渭北童  
歡娛看絕塞涕淚落秋風鵙鷺迴金闕誰憐病峽中

社前遭田父泥飲美嚴中丞

前人

步履隨春風村村自花柳田翁逼社日邀我嘗春酒  
酒酣誇新尹畜眼未見有迴頭指大男渠是弓弩手  
名在飛騎籍長番歲時久前日放營農辛苦救衰朽  
差科沒則已誓不舉家走今年大作社拾遺能住否



古今圖書集成  
叫婦開大瓶盆中爲吾取感此氣揚揚須知風化首  
語多雖雜亂說尹終在口朝來偶然出自卯將及酉  
久客惜人情如何拒鄰叟高聲索果栗欲起時被肘  
指揮過無禮未覺邨野醜月出遮我畱仍嗔問升斗  
二月二十七日社兼春分端居有懷簡所思者

權德輿

清晝開簾坐風光處處生看花詩思發對酒客愁輕  
社日雙飛燕春分百轉鶯所思終不見還是一含情

賽神

韓愈

白布長衫紫領巾差科未動是閒人麥苗含穗桑生  
甚共向田頭樂社神

吳楚歌詞

張籍

庭前春鳥啄林聲紅夾羅襦縫未成今朝社日停鍼  
線起向朱櫻樹下行

社日關路作

白居易

晚景函關路涼風社日天青巖新有燕紅樹欲無蟬  
愁立驛樓上厭行官埃前蕭條秋興苦漸近二毛年

嘉興社日

劉言史



消渴天涯寄病身臨邛知我是何人今年社日分餘  
肉不值陳平又不均

郊行逢社日

殷堯藩

酒熟送迎便村村慶有年妻孥親稼穡老稚效漁畝  
紅樹青林外黃蘆白鳥邊稔看風景美寧不羨歸田  
將發循州社日於所居館宴送裴夷直  
浪花如雪疊江風社過高秋萬恨中明日便隨江燕  
去依依俱是故巢空

社日村居

張演

一作張蟻

鵝湖山下稻梁肥  
狔穉穿鷄棲對掩扉  
桑柘影斜春社散  
家家扶得醉人歸

春社從李昉乞酒

宋李濤

社公今日沒心情爲乞治尊酒一瓶惱亂玉堂將欲  
徧依稀巡到第三廳

春社

梅堯臣

年年迎社雨淡淡洗林花樹下賽田鼓壇邊伺肉鴉  
春醪酒共飲野老暮相譁燕子何時至長臯點翅斜  
社日獨坐

范成大



古今圖書集成  
海棠雨後沁臙脂楊柳風前撚綠絲香篆結雲深院  
靜去年今日燕來時

春日田園雜興

前人

社下燒錢鼓似雷日斜扶得醉翁迴青枝滿地花狼  
籍知是兒孫鬪草來

社日諸人集西岡

朱熹

郊原愛芳物細雨青春時前岡遐敞地登覽情無遺  
農畝懷歲功壺漿祝神釐我慚里居氓十載勞驅馳  
今朝幸休閒追逐聊嘻嘻笑語歡成舊盡醉靡歸期

乙酉社日偶題

楊萬里

愁邊節裏兩相關茶罷呼兒檢曆看社日雨多晴較  
少春風晚暖曉猶寒也知散策郊行去其奈綠溪路  
未乾綠暗紅明非我事且尋野蕨作蔬盤

春社

陸游

太平處處是優場社日兒童喜欲狂且看叅軍喚蒼  
鶻京都新禁舞齋郎里剡林間請夢夢安

社雨

前人

開歲纔幾時春社忽已及茫茫草色深蕭蕭雨聲急



扶犁行白水不惜芒屨濕村童更可憐赤脚牛背立  
社鼓  
前人

酒旗三家市煙草十里陂林間鼓鼗鼗迨此春社時  
飲福父老醉嵬峩相扶持君勿輕此聲可配豐年詩  
社酒  
前人

農家耕作苦雨暘每關念種黍蹈麴蘖終歲勤收斂  
社瓮雖草草酒味亦醇醲長歌南陌頭百年應不厭  
社肉  
前人

社日取社豬燔炙香滿村飢鴉集街樹老巫立廟門  
雖無牲牢盛古禮亦略存醉歸懷餘肉霑遺徧諸孫  
社飲  
前人

東作初占嗣歲宜蠶官又近乞靈時傾家釀酒無遺  
力到社迎神盡及期先醉後醒驚老憊路長足蹇歎  
歸遲西村漸過新塘近宿鳥歸飛已滿枝

社日僧舍風雨

劉宰

借蔬香積共晨炊客裏良辰總不知孺子從渠均昨  
肉南翁無處聽巴詞神鴉得志飽終日巢燕無心來  
及時風雨聒人聾轉甚半鍾濁酒可能治



今朝當社日

戴復古

今朝當社日明日是花朝  
佳節惟宜飲東池適見招  
綠深楊柳重紅透海棠嬌  
自笑鬢邊雪多年不肯消

社日

方岳

燕子今年指社來  
翠瓶猶有去年梅  
丁寧莫管杏花俗  
付與春風一道開

社前

謝翱

無家借燕住離別又經年  
客館依山上春分到社前  
雨來換宿水雲起暗晴川  
颯颯吹衣帶因風問去船

社日

李公麟

千尋古櫟笑聲中  
此日春風屬社公  
開眼已憐花壓帽  
放懷聊喜酒治龔  
攜刀割肉餘風在  
上瓦傳神俚俗同  
聞說已栽桃李徑  
隔溪遙認淺深紅

社日二首

金施宜生

濁澗迴湍激青烟  
弄晚暉綠隨春酒熟  
分與故山違  
社鼓喧林莽孤城隱  
翠微山花羞未發  
燕子喜先歸  
割少諛諧語分均  
宰制功靈祇依古樹  
醉叟泥村童  
萬里開耕稼三時順  
雨風行春從此樂  
著意酒盃中



古今圖書集成  
社日城南

元戴表元

社日年年雨江花處處春  
漸成垂白老不見踏青人  
榆柳邊聲雜龍蛇歲事新  
端來近城郭猶自厭風塵

社日

郭鈺

甲子頻書入短篇  
細推五戊卜春田  
讀書未有平戎策  
止酒聊輸祭社錢  
紅樹花穠春向晚  
畫橋柳暝雨如煙  
舊來歌舞今誰是  
燕子茅檐只自憐

社日

明甘瑾

楓樹林邊雨脚斜  
兒童祈賽競喧譁  
鷄豚上戊家家

酒鶯燕東風處處花  
野徑歸時扶醉客  
叢祠祭罷集神鴉  
瀕湖生意愁多潦  
預祝汗邪載滿車

春社詞

瞿佑

十日一風五日雨  
社前拜祝神已許  
瓦盆潑灑斟濁醪  
高俎縱橫薦肥豸  
嗚嗚笛聲坎坎鼓  
俚曲山歌互吞吐  
老巫狡獪神有靈  
傳得神言爲神舞  
祭餘分肉巫自與  
醉裏狂言相爾汝  
小兒覓餅大兒扶  
頭上神花付鄰女

社中四首

陳憲章



古今圖書集成  
桑林伐鼓酒如川秋社錢多春社錢盡道昇平官長  
好五風十雨更年年

社屋新成燕子來山丹未落野棠開三三兩兩兒童  
戲弄水扳花日幾回

社酒開顏一百家春風先動長官衙東君也解遊人  
意紅白交開樹樹花

社日年年會飲同東原西埭鼓鼙鼙無人不是桃花  
面笑殺河陽樹上紅

社日

石瑤

春風簾幕駐晴雲社酒盃深我對君燕子未來花不  
語綠蕪寒雀共斜曛

社日出遊

方太古

邨邨社鼓隔溪聞賽祀歸來客半醺水緩山舒逢日  
暖花明柳暗值春分平田白洫流新雨絕壁青楓挂  
斷雲策杖提壺隨所適野夫何不可同羣

社日

媛項珮

過雨春泥白斜飛燕尾纖恰停鍼綫坐自起爲鉤簾







古今圖書集成  
驂高鶴但莫教容易逐西風輕飄却

青玉案

社日  
客居

趙長卿

去年社日東風裏向三徑開桃李脆管危絃隨意起  
綠陰紅影暖香繁藥伴我醺醺醉今年社日空垂  
淚客舍看花甚情意江上危樓愁獨倚欲將心事巧  
憑來燕說與人憔悴

點絳脣

秋社前一日  
溪光亭雨

張元幹

山暗秋雲暝鴉接翅啼榕樹故人何處一夜溪亭雨  
夢入新涼只道消殘暑還知否燕將雛去又是流

年度

柳梢青

秋社懷  
故山

楊无咎

送燕迎鴻未寒時節已涼天氣鍼線倦拈簾幃低捲  
別般風味 敲眠夢到山中共老幼扶攜笑喜桑柘  
影深鷄豚香美家人醉

木蘭花慢

社日  
有懷

嚴仁

東風吹霧雨更吹起袂衣寒正莽莽叢林潭潭伐鼓  
鬱鬱焚蘭闌干曲多少意看青烟如篆繞溪灣桑柘  
綠陰猶薄杏桃紅雨初翻 飛花片片走潺湲問何



古今圖書集成  
日西還歎擾擾人生紛紛離合渺渺悲歡想雲軒何處也對芳時應只在人間惆悵回文錦字斷腸斜日雲山

玉樓春

社前一日

史達祖

遊人等得春晴也處處旗亭咸繫馬雨前穠杏尚娉婷風裏殘梅無顧藉  
忌拈鍼指還逢社鬪草羸多  
裾欲卸明朝新燕定歸來叮囑重簾休放下

眼兒媚

社日

韓淲

風迴香雪到梨花山影是誰家小窻未晚重檐初霽

玉倚蒹葭 社寒不管人如此依舊是天涯碧雲暮合芳心撩亂醉眼橫斜

生查子

秋社

吳文英

當樓月半匳曾買菱花處愁影背闌干素髮殘風露  
神前鷄酒盟歌斷秋香戶泥落畫梁空夢想青春

語

青玉案

黃公紹

年年社日停鍼線爭忍見雙飛燕今日江城春已半  
一身猶在亂山深處寂寞溪橋畔  
征衫著破誰鍼



古今圖書集成  
線點點行行淚痕滿落日解鞍芳草岸花無人戴酒  
無人勸醉也無人管

青玉案 社日

明張大烈

千條弱柳拖青線應期到呢喃燕綠徧川原紅減半  
酬神賽會花陰人集深處芳洲畔 金壘醺醪頻頻  
勸沈入醉鄉斟尚滿解衣欲臥芳草岸花鋪錦裯松  
羅翠幕鳥奏無心管

社日部選句

宋顏延之詩園縣極方望邑社總地靈

梁元帝詩叢林多古社

庾肩吾詩枯桑落古社寒鳥歸孤城

北周庾信枯樹賦東海有白木之廟西河有枯桑之  
社

唐高適詩鬪鷄下社塵方合走馬章臺日半斜

韓愈詩願爲同社人鷄豚宴春秋

劉禹錫詩楓林社日鼓茅屋午時鷄



元稹詩我亦辭社燕茫茫焉所如又燕辭前日社  
李頻詩不任啼鳥思鄉社欲桑蠶

韓偓詩此身願作君家燕秋社歸時也不歸  
周曇詩一朝如得宰天下必使還如宰社時

宋蘇軾詩鼓吹却入農桑社又願同荔枝社長作雞  
黍局

張舜民凝壽寺記負夕陽見里社

黃庭堅詩踏歌夜結桑神社

秦觀詩後春萼茁滑於酥先社薑芽肥勝肉

陸游詩鷄豚雜還祈蠶社又身入兒童鬪草社

陳造詩盃酒清濃肉更肥咸言趁社極歡嬉

方夔詩斜陽鴉噪燒錢社細雨牛眠放牧陂

金李俊民詩誰能宰似陳平社那免悲如宋玉秋

元好問詩父老漸來同保社兒童久已愛文章

元方回詩許追父老雞豚社為說猶能醉頰紅

曹伯啓詩夢想枌榆社披襟坐藜牀

明高啓詩秋社未開綠醞夜炊初碓紅糠



社日部紀事

周禮地官州長以歲時祭祀州社訂義賈氏曰上云歲

時皆謂歲之四時此云歲時惟春秋二時耳春祭社

以祈膏雨望五穀豐熟秋祭社以百穀豐稔所以報

功故云祭祀州社

史記封禪書高祖初起禱豐枌榆社天下已定詔御

史令豐謹治枌榆社常以四時春以羊彘祠之

西京雜記高祖既作新豐併移舊社衢巷棟宇物色

惟舊



古今圖書集成  
史記陳丞相世家里中社平爲宰分肉食甚均父老  
曰善陳孺子之爲宰平日嗟乎使平得宰天下亦如  
是肉矣

蓋庠縣志漢董龍家貧與里人共祀社衆買牲牢龍  
撰文以祭祭畢分胙衆不平逐龍出龍造泥飯以祭  
於樹下將焚文有白鼠銜文入地穴掘之獲白金一  
斗龍不自私率衆首官縣令賢之奏聞表其閭曰義  
士

後漢書應劭傳中興初有應媪者生四子而寡見神

光照社試探之乃得黃金自是諸子宦學並有才名  
至場七代通顯

武陵先賢傳潘京爲州辟進謁值社會因得見次及  
探得不孝刺史問曰辟士爲不孝耶京舉版答曰今  
爲忠臣不得復爲孝子其機辯如此

四民月令二月祀太社之日薦韭卯于祖禰

長沙傳魏長沙郡久雨太守呂虔令戶曹掾齋戒在  
社三日三夜祈晴夢見白頭翁曰汝來遲明日當霽  
果然



古今圖書集成  
魏志王修傳修年七歲喪母母以社日亡來歲鄰里社修感念母哀甚鄰里聞之爲之罷社

世說阮修字宣子伐社樹有人止之宣子曰社而爲樹伐樹則社亡樹而爲社伐樹則社移矣

王肅魏臺訪議帝問何用未社丑臘對曰王者各以其行盛日爲社衰日爲臘漢火德衰于戌故以戌日爲臘魏土也土畏木丑之明日便寅寅木也故以丑臘土成于未故以歲始未社也

北史李士謙傳士謙髻鬣以孝聞伯父瑒稱此兒吾家顏子也李氏宗黨豪盛每春秋二社必高會極宴無不沈醉喧亂嘗集士謙所盛饌盈前而先爲設黍謂羣從曰孔子稱黍爲五穀之長荀卿亦云食先黍稷古人所尚寧可違乎少長肅然無敢弛惰退而相謂曰旣見君子方覺吾徒之不德也

舊唐書武后本紀載初三年九月改元爲長壽改用九月爲社大酺七日

中宗本紀神龍元年三月丙午改秋社依舊用仲秋唐會要開元十九年正月三十日詔州縣社惟用酒



補

清異錄予偶以農幹至莊墅適秋社莊丁皆戲社零  
星蓋用猪羊雞鴨粉麪蔬米爲羹

和魯公嘗以春社遺節饌用奩惟一新樣大方盃覆  
以剪鏤蠟春羅椀內品物不知其幾種也物十而飯  
二焉禁庭社日爲之名粹驕羊

玉海咸平二年八月戊午社宴近臣於中書作社日  
五言詩賜之屬和

宋史閻守恭傳守恭在并州因春社會賓客曰守恭

太原一貧民爾徒步位刺史老復官鄉里踰分多矣  
今日與卿輩訣後十日卒

詩話大社二祭多差近臣王岐公禹玉在兩禁二十  
年熙寧間爲翰林學士復被差題詩於齋宮曰鄰鷄  
未唱曉驂催又向靈壇飲福盃自笑治聾知不足明  
年強健更重來

東京夢華錄八月秋社各以社糕社酒相賣送貴戚  
宮院以猪羊肉腰子奶房肚肺鴨餅瓜薑之屬切作  
棋子片樣滋味調和鋪於飯上謂之社飯請客供養



古今圖書集成  
人家婦女皆歸外家晚歸卽外公姨舅皆以新葫蘆  
兒棗兒爲遺俗云宣良外甥市學先生預斂諸生錢  
作社會以致雇倩祇應白席歌唱之人歸時各攜花  
籃果實食物社糕而散春社重五重九亦是如此  
遵生八牋二月令幼小兒女早起避社神免至面黃

社日部雜錄

詩經大雅生民章載謀載惟傳嘗之日涖卜來歲之  
芟獮之日涖卜來歲之戒社之日涖卜來歲之稼疏

社文在嘗獮之下謂秋獮祭社也嘗在孟秋獮社俱  
在仲秋取禽而後祭社故先獮後社也嘗社是祭神  
之事耳因而問卜獮乃秋獵不接神明亦言卜來歲  
者卜者自問吉凶於龜不由嘗社所祭之神

雲漢章祈年孔夙方社不莫箋祈豐年甚早祭四方  
與社又不晚



古今圖書集成  
國語土發而社助時也注土發春分也社者助時求福爲農始也

孝經援神契仲秋穫禾報社祭稷以三牲何重功故也

淮南子精神訓今夫窮鄙之社也叩盆拊瓠相和而歌自以爲樂矣嘗試爲之擊建鼓撞巨鐘乃始仍仍然知其盆瓠之足羞也

何承天社頌余以永初三年八月大社聊爲此文實惟陰祇稷爲穀先率育萬類協靈昊乾霸德方將世

號共工廠有才子實曰句龍稱物平賦百姓熙雍唐堯救災決河流江棄亦播植作乂萬邦克配二祀以報勳庸歲云其秋晷漏均程牲牢旣潔嘉薦惟馨乃家乃國是奉是尊

詩序載芟春籍田而祈社稷也疏序本其多獲所由言其作頌之意經則主說年豐故其言不及籍社所以經序有異也月令孟春天子躬耕帝籍仲春擇元日命民社然則天子祈社亦以仲春與耕籍異月而連言之者俱在春時故以春總之



古今圖書集成  
良耜秋報社稷也

啓顏錄敬白社官三老等切聞政本於農當須務茲稼穡若不雲騰致雨何以稅熟貢新聖上臣伏戎羌愛育黎首用能閏餘成歲律呂調陽某人等並景行維賢德建名立遂乃肆筵設席祭祀蒸嘗鼓瑟吹笙絃歌酒讌上和下睦悅豫且康禮別尊卑樂殊貴賤酒則川流不息肉則似蘭斯馨非直菜重芥薑兼亦果珍李柰莫不矯首頓足俱共接盃舉觴豈徒戚謝歡招信乃福緣善慶但某乙索居閑處孤陋寡聞雖

復屬耳垣牆未曾攝職從政不敢堅持雅操專欲逐物意移憶肉則執熱願涼思酒如骸垢想浴老人則飽飫烹宰某乙則饑厭糟糠欽風則空谷傳聲仰惠則虛堂習聽脫蒙仁慈隱惻庶有濟弱扶傾希垂顧答審詳望咸渠荷滴瀝某乙卽稽顙再拜終冀勒碑刻銘但知悚懼恐惶實若臨深履薄

本草拾遺社壇餘胙酒治小兒語遲納口中佳又以噴屋四角辟蚊子

埤雅燕之往來避社而嫌土不以戊己日籥口布翅



古今圖書集成  
枝尾

石林詩話世言社日飲酒治聾不知其何據五代李  
濤有春社從李昉求酒詩云社公今日沒心情乞爲  
治聾酒一瓶惱亂玉堂將欲徧依稀巡到第三廳昉  
時爲翰林學士有日給內庫酒故濤從乞之則其傳  
亦已久矣社公濤小字也唐人在慶侍下雖官高年  
皆稱小字濤性疏達不羈善諧謔與朝士言亦多以  
社翁自名聞者無不以爲笑然諒直敢言後官亦至  
宰相

桂海蟲魚志天蝦狀如大飛蟻秋社後有風雨則羣  
墮水中有小翅人候其墮掠取之爲鮓

墨莊漫錄今人家閨房遇春秋社日不作組紉謂之  
忌作故周美成秋藥香詞乳鴨池塘水暖風緊柳花  
迎面午粧粉指印窻眼曲理長眉翠淺聞知社日停  
鍼線採新燕寶釵落枕夢春遠簾影參差滿院予見  
張籍吳楚詞云前庭春鳥啄林聲紅夾羅襦縫未成  
今朝社日停鍼線起向朱櫻樹下行乃知唐時已有  
此忌循習至今也



古今圖書集成  
鷄肋編江南人謂社日有霜必雨丙辰春社繁霜濃  
瓦次日果大雨

通考春社日雨年豐果少

農桑通訣八月社前即可種麥麥經兩社即倍收而  
堅好

帝京景物略采育東南二十里有阜高一丈廣三四  
十尺曰聚燕臺歲秋社燕辭巢日必各將其雛數千  
百聚此臺呢喃一二日然後分翔而去

田家五行秋社日應候田園樂事並與春社同但景

物異耳

羣芳譜種植山藥春社日取宿根多毛有白瘤者竹  
刀截作二寸長塊先將地開作二尺寬溝深三四尺  
長短任意先填亂糞柴一半上實以土將截斷山藥  
監埋于中上仍以糞土覆與溝平時澆灌之苗生以  
竹或樹架作援高三四尺當年可食



社日部外編

佛經世尊見殺牛羊以爲社戒之云地獄滿塞正坐  
殺害汝等何以爲社奉齋守戒則獲福無量矣

馬氏日抄昌平縣北狄梁公祠元大德中重建學士  
宋渤記之穹碑尚存常有光怪每歲二月二日南山  
北山之人皆來作社前數日夜碑上卽有火光遠望  
碑字皆見近視之卽滅



花朝部彙考  
提要錄

花朝

二月十五日為花朝高麗以是日為上元節今吳俗以二月十二為花朝

事物原始

花朝

二月十五日為花朝風土記云浙間風俗言春序正中百花競放乃遊賞之時花朝月夕乃世所常言月



古今圖書集成  
夕者乃八月十五夜也

直隸志書各省風俗同者不載

### 宛平縣

二月十五日曰花朝小青綴樹花信始傳騷人韻士  
唱和以詩

### 遵化州

花朝日農家取糠粃分縷爲黃道青道倉庾曲折引  
之或盤井幹或繞門石曰引龍龍擡頭也煎元旦祭  
餘糕餅熏牀炕曰熏蟲兒蟲不出也分造酒酢以次

### 舉趾

### 鷄澤縣

二月十五日花朝祭花神

### 宣府鎮

二月十五日爲花朝節村民以五穀瓜果種相遺謂  
之獻生城中婦女剪綵爲花插之鬢髻以爲應節云

### 山東志書

### 曹縣

春分爲花朝賞花釀酒



古今圖書集成  
山西志書

黎城縣

二月十五日爲花朝亦曰花節士人咸宴遊

未寧州

二月二日花朝以炭灰圍壁根辟蛇蝎諸蟲

河南志書

羅山縣

二月二日花朝小兒蓄頂髮名小名農夫墾田地種  
春菜

陝西志書

清水縣

二月十五日催花

江南志書

長洲縣

二月十二日爲花朝晴則百物成熟諺云有利無利  
只看二月十二

嘉定縣

二月十二日剪綵條繫花果樹云百花生日按唐以



古今圖書集成  
二月十五日爲花朝以八月十五日爲月夕今俗以  
二月十二日爲花朝不知何據

松江府

二月十二日花朝羣卉徧繫紅綵以祝繁盛

如臯縣

花朝二月十二日一日十五日好事者多置酒園亭  
或嬉遊郊外常以是日陰晴卜果實繁稀

通州

花朝郊遊訪花閨中幼女以是日穿耳

廣德州

花朝士女踏青

浙江志書

杭州府

洛陽記以二月初二日爲花朝唐人以十五日爲花  
朝西溪一帶梅花甚盛沿互十餘里清芬襲人中多  
別業往往高人逸士托足其間或肩輿小艇載酒殺  
攜襪被有旬日始歸者

烏程縣



古今圖書集成  
二月二日花朝士女皆摘蓬葉插于頭諺云蓬開先  
日草戴了春不老

桐廬縣

二月十五日俗傳以此日之晴雨卜衆卉之豔否名  
曰花朝有備猪羊品物以合祭其祖先謂之春祭卽  
古雨露之思也

江西志書

浮梁縣

二月十五日官率老農迎花神于東郊以勸農

湖口縣

花朝士女郊遊踏青插柳爲飾男女蓄髮冠笄亦以  
是日行婚禮

瑞州府

花朝日友朋蒔花之家各邀客飲文者賦詩

新昌縣

二月十五日花朝采百花酣飲謂之賞花

萬載縣

花朝各塾學備茶果議束修午後設宴賓主盡歡而



罷

湖廣志書

通山縣

二月十五日花朝曰撲蝶會

石首縣

二月花朝至十五日戶戶望天晴月皎俗云花朝月明綿花十分

瀏陽縣

二月十五日爲花朝穿幼女耳

按花朝無定期洛陽記以爲二月二日事文玉屑以爲二月十二日與今吳俗同提要錄云唐以二月十五日爲花朝月令廣義云宣德二年二月十五日御製花朝詩賜裴尚書本今京師亦主十五日與楚俗同以唐明之事觀之帝王所命楚俗爲正

攸縣

二月十五花朝民間男女小者歲餘蓄頂髮大者十三四蓄鬢髮名曰禁頭



巴陵縣

二月望日花朝節謂是日晴則土饒木棉

福建志書

漳浦縣

二月花朝鄉人有為春祈會者如元夕例濱海地常舉之近郊則稀

廣東志書

香山縣

花朝二月望日俗曰大王齋村民各祭其祠神即荆

楚俗腰祭也

四會縣

二月花朝鄉人賽神祭社歲立一社首謂之福頭



花朝部藝文

詩詞

御製花朝賜兵部尚書裴本

明宣宗

五雲晴護蓬萊島  
 瑤彩繽紛動瑤草  
 憑高一覽六合  
 間萬象呈明春意好  
 融融佳氣靄山河  
 大地無塵海不波  
 松篁檜柏翠浩蕩  
 紫杏丹桃繁綺羅  
 燕語鶯啼滿清聽  
 鳶飛魚躍總天性  
 輕車駿馬趁年芳  
 處處壺漿樂游詠  
 三農耕稼皆舉趾  
 東阡西陌鷄鳴起  
 丁男把耒婦女饁  
 齊力欲教田畷喜  
 況值新年風雨時  
 百穀豐穰真可期  
 邊隅寧靖民物遂  
 嘉與臣庶同娛嬉



古今圖書集成  
翠殿彤臺白晝長花繞龍池清水香瑤箏齊唱錦瑟  
和鬱金酒泛紅玉觴花晨廣筵春似海君臣遭逢實  
千載豈但怡情共令辰一念華勳待元凱聖王致理  
循時令自古明良協恭敬陽春德澤生光輝延佇嘉  
謀輔仁政

花朝張太學西園小集

陸之裘

雨霽名園春事芳蘭臺小集暮行觴愆期肯使花神  
笑縱飲誰嗔草聖狂入座微風含楚佩照人明月墮  
匡牀行歌亦有穿雲調隔水遙傳陌上桑

花朝

湯顯祖

妒花風雨怕難銷偶逐晴光撲蝶遙一半春隨殘夜  
醉却言明日是花朝

花朝

王衡

晴煙高露若爲容躑躅香苞望曉紅莫怨五更風色  
惡開花原是落花風

花朝遇雨

范景文

春陰偏是趁今朝妒暖餘寒尚自饒花意如人初中  
酒柳容似凍未舒條踏青遊屐方微濕聽雨吟魂却



古今圖書集成  
暗銷煙裏空濛飛翠冷總無紅紫亦堪描

花朝

吳稼塏

日氣朝青池上波交交啼鳥倚池多三春花事終難  
負二月風光半未過土俗歲時存舊記閨人單袂製  
輕羅正憐一樹櫻桃放桃李相催奈若何

仲雪見示花朝二詩依韻奉和 錢謙貞

春色平分已自奢今朝風物更鮮華山因柳綠常含  
雨天爲桃紅不放霞芳草齊時看寶馬好風多處見  
香車賤天有事君知否要乞輕陰爲養花

花下揮盃對月邀千金何處買春宵桃開舊面還如  
笑柳長新眉不用描病後三分應重惜愁中一片忽  
輕飄陽春絕調人間少莫怪花朝變雪朝



浣溪沙

花朝

明楊基

鸞股先尋鬪草釵  
鳳頭新繡踏青鞋  
衣裳宮樣不須裁  
雕玉鏤成鸚鵡架  
泥金鐫就牡丹牌  
明朝相約看花來

滿庭芳

花朝

商輅

鶴徑寒烟燕巢華  
露小窻夜雨新晴  
竹欄苔砌寂寂  
點芳春屈指春光已半  
徒翹首千里關城雲橫處  
蠻笙戍角隱隱雜啼鶯  
放衙人乍散  
琴拋案牘酒載郊垆  
身世風前絮更欲何憑  
十載邯鄲古道枕中事



古今圖書集成  
暗裏魂驚車茵軟儘容酪酏杜宇任多情

花朝部紀事

舊唐書羅威傳威服膺儒術招納文人聚書至萬卷  
每花朝月夕與賓佐賦咏甚有清致

風土記宋制守土官於花朝日出郊勸農

誠齋詩話東京二月十二日日花朝爲撲蝶會

翰墨大全二月二日洛陽風俗以爲花朝節

明宣德二年御製花朝詩賜尚書裴本

經籍會通燕中書肆多在大明門之右及禮部門外  
拱宸門西花朝後三日則移於燈市每朔望并下浣



五日則移於城隍廟中

花朝部雜錄

熙朝盛事二月十五日爲花朝節蓋花朝月夕世俗恆言二八兩月爲春秋之中故以二月半爲花朝八月半爲月夕也是日宋時有撲蝶之戲今雖不舉而寺院啓涅槃會談孔雀經拈香者麇至猶其遺俗也







